



11. september 2020

UKA 2020/144

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

**Nunatut siunissami qimaasunik tiguisarnissarput piareersimaffigalissaneripput pillugu apeqquteqaat allaavigalugu oqallinnissamik siunnersuut.**

(Inatsisartunut ilaasortaq Malene Vahl Rasmussen, Demokraatit)

**Tungavilersuut**

Tallimangornermi apriliip ulluisa 12-anni 2019 timmisartog Kangerlussuarmiik Nuummut mippoq. Timmisartog amerlanertigut ullut tamaasa taamatut ingerlaartarpoq aamma tupinnartoqanngilaq. Taamaakkaluartorli miineq ulloq taanna immikkuullarissuuvoq. Ilaavormi inuk nunatsinni nunasiniarluni qinnuteqarnikuusoq. Kalaallit Nunaannut qimaasut siullersaat.

Nunani allani taamatut ullut tamaasa pisoqartarpoq, Kalaallit Nunatsinnili immikkuullarissuuvoq. Ileqqorinngilarput qimaasunik tiguisarneq aamma tikilluaqqusisussaqaanngilagut inuiaqatigiinnullu akuulersitsinissamut inatseqarata. Ajornartorsiut imaannaanngilaq naatsumillu oqaatigalugu oqallinnermut matumunnga tunuliaqutaavoq.

Oqaatigeqqaarlara inuttut nammineq isumaqarama uangut kalaallit tikikkuminartuusugut. Tikeraartoqarneq nuannaraarput. Nuannarisarparput ikiuussinnaangaangatta. Apeqqutitsialalli tassaavoq nunatut - naalagaaffittut - piareersimanersugut qimaasunik tiguisilluta akisussaafferujussuaq kivissinnaaneripput. Uanga isumaga naapertorlugu piareersimannngilagut.

Nunagisamit qimaagaanni annermik minnerusumilluunniit kingunerlutsitsisoqarsinnaasarpoq. Amerlaqisut angerlarsimaffimminnik taasaminniit qimaanikuusarput qularnanngitsumik ikinngutit ilaqtallu qimallugit. Taamaattumik tarnip pissusaanut immikkut ilisimasalimmit ikiorneqarnissaq pisariaqartarpoq aamma inuunerup ingerlaqqinnissaanut ikiorneqarnissartik pisariaqartittarpaat. Tamanna neqeroorutigisinnaavarput?

Illumuullunga oqassaguma nunaqqatigulluunniit kingunerlutsitsisut tarnip pissusaanut immikkut ilisimasalimmik oqaloqateqartarnissaat neqeroorutigisinnaanngilarput, taamaattumik uppernanngilaq qimaasunut taamatut neqerooruteqarsinnaanissarput.

Ineqartitsinissaq aamma ajornaatsuinnaasussaannngilaq - sualummik illoqarfinni annerni, taakkunanimi innuttaasut amerlaqisut inissaminnik utaqqipput.

Parlattuanilli nunarput qimaasunut suliffissarsissussisinnaapput, ilinniarsimannngitsut sullivii arlallit



inuttaleruminaatsippagut aamma allatut ajornartumik tamanna pissutigalugu sulliviit nunani akissarsiakiffiusuninngaanniit sulisussaminnik tikisitsisariaqartarput.

Apeqqutaalluinnarporli qimaasut kingunerlutsitsisut sulinissaminnut piareersimassanersut tarnip pissusaanut immikkut ilisimasalimmik eqqortumik ikorneqaqqaarsimatinnatik. Isumaqarpunga ajornassasoq.

Paarlattuanilli isumaqarpunga pissusissamisuussasoq oqallisigissallugu nunanut qimaasut qanoq allatut ikiorsinnaassanerigut. Immaqa Aningaasanut Inatsisikkut aningaasanik immikkoortitsisalersinnaavugut qimaasut nunagisaasa qanittuini ikiuinermut atugassanik?

Uannut pingaaruteqarpoq inatsisartutut isummerfigisariaqaratsigu qulequtaq pisara oqallisigilluarlugulu taamaattumik tamanna tunngaviglaugu Naalakkersuisut partiilli allat saqqummiussassaasa tusarnissaannut qilanaarpunga.

Taamatut oqaaseqarlunga kissaatigaara kusanartumik isumatumillu oqallikkumaartugut.